

重校
箋註

錢牧齋全集

三
五

有學集卷三十

牧齋全集第二種

墓誌銘

虞山 錢謙益 牧齋 撰

光祿大夫贈少保兼太子太保吏部尚書諡文通鐵山王公墓誌銘

高郵鐵山王公舉天啓乙丑進士令大田仁和二縣以卓異聞忤執政左官量移饒州司理稍遷戶部郎崇禎末東西交訌縣官急才用邊畧推舉備兵通州通爲神京左臂奸宄豪右盤互窟穴公通明強直奮髯抵几彈治肅然東省劇盜跨州連邑遂舉特簡往撫簡士馬設方畧龍山七營諸賊次第就縛如獮狐鼠未幾有總督遼薊之命當是時流氛披猖廟算旁午兵食交匱撫鎮一空謀國者非以辦賊責公也病急求醫趣舉之而已矣誤國者亦非欲以掣肘困公也無米索炊姑聽之而已矣公以一官兼理督治之重任旣孤掌而難鳴以獨身控陵京山海之危疆雖鞭長而莫及以二萬餘叢長坐甲之疲兵支數十萬

百戰建瓴之強寇分身不能剋肉何補雖復洒血臨戎靴刀誓衆而前知其不可爲矣在事經年抗疏條奏請分設薊遼二督勿兼顧東西以誤封疆請留近畿兵基置屯守勿遠戍關外以空肘腋請撤寧守關命遼鎮抽練馬步精兵呼吸應援勿以賊尙未渡河偷餘隙而忘警急其言皆刺心剋骨劈肌中理取次報聞而已事益急請急徵天下勤王兵命遼鎮臣登壇受鉞而身自任援剿斬首輔陳演頭竿之軍前以謝天下事不效則斬臣以謝演奏未及報而寇已陷雁門乃倉皇用公言臨遣閣臣督師辦寇命公星馳守關公抵關未浹日抽兵束馬宵征赴難而都城已失守矣公當艱危受命已誓必死具含玉歌虞殯古之介夫猶能相厲而況于公乎入援則不及攀髯則無從納弘演之肝何以報命噉霽雲之指誰與乞師喪亂甫息使命頻頒天地爲籠逝將何所公于是幡然而起彈冠振衣以赴風雲之會所謂天實爲之而非其所死之本懷也嗚呼天之方蹶誰秉國成輕疆索如奕棋委聖主爲孤注號咷氣盡飛走路窮心傷

廟社之銷沉目覩山河之斷送公其如人何以千金一壺之身當大厦一木之任九域颺迴三精霧塞洪流寧抑于手障嵐風詎返于口吹公又其如天何既而星移日轉葭動灰飛精白一心陳謨佐命起廷評歷副貳掌邦政陟綸扉誠可格天言可底績上尊畫像寵異于生前殊錫易名便蕃于身後昔者伊生五就拜幣聘于有莘仲父一匡謝溝瀆于堂阜楚才晉用國士所以長嗟秦智虞愚賢哲爲之永歎千載而下夷考公之本末猶將歛噓煩醒執簡流涕而况身當並世撫塵接跡者乎嗚呼其可悲也已公諱永吉字脩之一字六謙揚之高邇人生于己亥年十一月二十日卒于己亥年二月初六日公之喪至自燕嗣子明德奉歛寵命大葬于躊躇山之原屬龔大憲孝升序次行狀而以隧道之碑來請惟公歷官行事嘉謨偉烈勒景鐘而書冊府孝升之狀遑矣雍門之琴興哀牧豎蓋山之泉赴節絃歌余爲公誌沉吟抑塞有餘恫焉古之爲文者行狀以上史館牒考功墓誌以質幽竈訊來者舉例各有例當故其文亦不得而

同也銘曰

光岳之氣有合有分淮揚維揚挺生俊人運叶半千照鄰庶幾昔秦今王蔚
爲民譽出宰百里吏畏民懷精金能割直絃不回嗟彼驕人浮石沈木以我
廻翔謝彼謠詠白翎羣飛蒼鵠告哀持祿有人急病乏才公居冗散物望突
兀譬如稠林直木先出乃監畿輔乃撫齊魯乃督薊遼疲馬彫弓空拳徒手
鐵鹵課飛絆足責走賊之間臣拘我綸閣俯摸牀稜仰視巢幕叫號泣血百
不一聽河決魚爛大命以傾龍胡天高鶴表地絕枯腸寸斷愁心千折烏頭
馬角魚腹鯨波百死不死有神護呵黃冠歸里白馬有朝丹地密勿紫閣岩
堯國資元龜時仰箴砭生踐棘槐沒增班劍舊績未愬新恩洊加挹彼注茲
天咫不遐高原鬱紆靈旗徙倚宰木南枝墳樹西廩哀哀孝子篤念陵谷徵
辭舊史琬琰是告茫茫桑海沉沉劫塵斧柯有朽告于斯文

故宮保大學士孟津王公墓誌銘

近代儒者不講六書之議自李茶陵楊新都後幾爲絕學天啓間孟津王公覺斯蔚起詞林以六書爲己任如李監之生開元也公之學書也鳥跡壁書夏銘秦刻梵淨佉盧三元八會莫不窮究宗祖極命傍生秘閣諸帖部類繁多編次叅差蹙衄起伏趣舉一字矢口立應覆而視之點畫戈波錯見側出如燈取影不失毫髮是爲公之書學興酣筆落潑墨濡神蠅頭細楷擘窠狂草風雨發作于行間鬼神役使其指臂師宜之揮壁子敬之掃帚天地萬物有動于中無不予書發之是爲公之書才勁而不猛若鷹隼之戾天豐而不沈兼翬翟之備色所謂藻曜而高飛書之鳳皇也巖廊弘敞簪裾肅穆戢銳于內振華于外昔人稱徐季海書有君子之器焉是爲公之書品然而公之爲人于學于才于品則又有大焉者請移其書以論之苞孕古今囊括典俗辨經史之源流萃斯文之體要或一揮而數制或一飲而百篇行則口占臥則腹藁人曰公之學博而敏官史局以史事擅長官坊局以公望倚重事崇禎先帝于北啓沃講筵論列邊

計鑿鑿不爲窾言事弘光皇帝于南獎護忠直疏解禁錮侃侃有以自處人曰公之才明而允疎節闊目坦衷直腸推賢讓能不啻口出慰藉饑渴常若由已不爲崖岸斬絕之行不附翕熱噂沓之黨以山水爲園囿以歌咏爲鼓吹以文章朋友爲寢食人曰公之品逸而端生平規言矩行動止有常旣入北廷頽然自放粉黛橫陳二八遞代按舊曲度新歌宵旦不分悲歡間作爲叔孫昭子耶爲魏公子無忌耶公心口自知之子弟不敢以間請也辛卯六月禮白帝于華山度毛女峯度回心石自傷腕晚賦詩以見志登蓮峰望大壑自詫善載腐軀朽骨屏營不欲下者久之烽火噩夢彳亍告勞抵家未浹日飾巾長逝於乎悽矣昔金元亡後故直學士王若虛從之與渾源劉祈東遊泰山至黃峴峰憩萃善亭謂同遊曰汨沒塵土中一生晚年乃造仙府遣其子前行視路垂足坐大石上瞑目而逝公與從之皆王姓皆有聲翰苑從之遊泰而解形公遊華而長往百年而下記二岳遊者其將比而同之耶否耶從之遺民舊老微服東遊而

公有事祭告泰華之靈視兩人之遊迹亦將如世眼之差別耶否耶迨削成四方不知天不可升矣白帝少昊之司百神之所宗代祭告虔之時神祇蒞止肅饗赫然其亦有靈爽憑焉而挾以俱往耶公易簀時云有仙迎我蓋知之悉矣公諱鐸字覺斯河南之孟津人天啓壬戌進士歷官具在國史祖 父 俱以公貴贈如其官祖妣 氏妣 氏妻 氏俱贈一品夫人公生于 年 月日卒時年六十有一子五人葬于某地之某阡余與公同官交好酒闌歌罷談說生平輒以不朽爲託故于其子之請銘不敢以老病辭系之銘曰

鴻朗莊嚴昭有融光岳氣合生駿容魁顏偉幹聲如鐘珠囊玉杯推國工西清東壁羅心胸廣廈細旃達帝聰槐廳柳院聲實隆駕鵝雙飛五馬東延登受策憂心冲飈迴霧塞天夢夢吁嗟一柱頽吳穹高文巨什琬琰崇海涵地負無終窮八分三體追高蹤下躡義獻上斯邕鸞翔鵠峙驚鬱葱魚頰鳥頤何匆匆縹緲縑素流蠻戎豐碑貞石爭磨礪如椽筆補造化工誰云文藝徒

彫蟲薈收別館少昊宮巨靈高掌光熊熊車箱栝矢與天通燿火既舉登蓮
峰玉漿金醴觴芙蓉歸來竹杖成茅龍揮手高揖青鳥公溥南羽化將無同
金天帝醒移策封昭王博銘翳蒙茸華陰授璧懷抱中天門跌蕩秋禮終佳
城鬱鬱開中嵩我裁銘詩依變風千年吐氣成白虹

故福建建寧府推官待贈吏科給事嘉善柯君墓誌銘

昔人重進士科有司謂之座主今翰林典春秋試事亦稱座主師資之誼自昔
而然雖仕自卿相亦必曰出某人之門比其衰也座主門生苑枯遷改或掉臂
以去或掩面而避朝盈夕散比于虛市辛酉秋試余時舉于浙者百人計終始
不相偁背者六七人而已此六七人者今既不可復得余雖不欲子然顧影自
歎其無徒也其可得乎嘉善柯君六七人之一人也君累試舉進士司理建寧
五年謝事里居十五年而卒其子給事君聳謁余江村苴絰稽首哭而請曰唯
先子出夫子之門願有述也嗟乎給事身在日月之際不以老髦捨我而以不

朽其親爲託則君父子間家人私語契闊談讌其念我可知也古人以人世相
閱託末契于後生余之所期許于六七人者暮節頽景可益信不誣于給事之
請爲之洑瀾涕洟執簡而輟筆者數矣其何忍辭按狀君諱元芳字月傳先世
莆田人慶元路學正仲爵始居嘉善之甌川祖年九十有二邦人推爲壽耆父
慷慨多施予母趙氏君弱不好弄才筆能沾丐數人年二十五舉于鄉余旅見
之目曰端視而神穩必君子也五上公車報罷帷燈緹灰淑慎如處女丁丑舉
南宮見于漳浦黃公公目之如余益自礪曰吾得奉教兩夫子有餘師矣居贈
公喪有聞服除授建寧府推官建寧介入閩上遊龐茸獷悍號爲難理君爲政
釐積案薙宿蠹焚速訟懲簪筆愼平反杜請託老文法吏雁鷺列行受署莫敢
仰首周視案牘亭擬閱實每歎曰彼爲隱忌峭刻之文暴揚燕私點污帷簿其
如人子孫姓若何且獨不爲子孫地乎其大要以覈官評正刑書持大體養元
氣兩署郡篆再署甌浦按行屬城所至辦肅他鷙擊毛舉者顧弗如也浦城接

壤壽寧江山蔴說賊盤互剽掠君募壯勇設關諜擒賊首五大王餘黨竄伏君還郡監司倖功僨師顧以遺寇嗾君坐鑄一級已而賊復嘯柘浦約日取浦城君署部訶知之午夜勒郡邑兵分道掩捕質明七十餘首反手就縛諸大吏驚而相告是果能辦賊非縮朒縱賊者當君鑄級時屬邑令夏彝仲黃石公奮袂與直指抗辨請解符印去而閩人亦相率訟言于朝卒用得直蓋崇禎季年當宁厲精吏議與清議猶能互相撻拄舉閩而他可知也甲申用理績殊異行取第一未及上而國難作解官歸隱太孺人在堂長筵孫子遂閒居奉母之志給事令棗陽內召君喜曰自今可以舒眉坦腹長爲逸民矣簾閣綈几著書不輟優游考終飾巾待期亂世士大夫所希有也君初舉進士觀政得贈公家書心動曰無疾病何以非手跡耶請急馳歸及門而贈公病革矣執手慰問扶抱進袍服奉觴再拜贈公頷之而喜蓋踰月而後歿人以自知搯臂嚙指古孝子非虛語也爲舉子病咯血良醫搖手相視夢三丈夫診病前行者却指第三人曰

能療汝君拜之以藥一丸投盂水戒飲盡手摩頂數周輒大吐雜然譴曰愈矣
芬香迸口齒間越翌日里人以脩三官祠來告問其巾服則所夢也自是病良
已易簣時語所知曰吾生平無愧心事此時較有得力處頻申瞑目如入禪定
蓋君之居心制事清明誠一與神明通者久矣君享年六十有二妻俞氏子即
簪己丑進士今吏科給事中余惟君內行淳古服官廉平金聲玉色美不勝書
也以一言蔽之曰厚夫世風之日趨于薄也猶醅之薄而爲醪也醇酎百末甜
醪九枚用以奠東皇而享太乙非厚不可余以老民野史叨載筆之任愼歎于
君臣父子間庶幾使世之梔貌蠟言囂然相命者知所以鏃厲而歸厚也銘曰
漢世公卿皆稱長者風流邈矣史失求野游光射聲頭角熊熊如鐘鏘號其
內則空塗車曷駕木鷲不舉如尸土龍而祈降雨溫溫恭人職思其居樸遯
惻惻歲計有餘仁厚之名淡無可喜如酒九醞咀嚼彌旨火膏炷光土膏脉
發德膏厚矣匪薤胡搢武原之南流泉日陽膺膺鮮原迺迺迺藏鄙寬薄敦

古也有志我鑄銘章來者是爲

亞中大夫福建布政司左叅政管延平府事朱君墓誌銘

君名曰爍字靜之家世大梁宋南渡徙崑山祖熙洽舉進士官貴州按察司副使父萊母徐氏舉萬曆壬子鄉試署懷遠教諭崇禎末由國子監丞歷工部營膳司主事弘光元年復職慈禧宮成陞福建右叅政管延平府事未行而國難作矣君爲監丞甫一日城守事亟用推擇添主工部派守永定門首當敵衝控弦游奕不絕中人立燈竿掛敵樓劇戲如小兒巡視大臣唯唯君正色折之不少避解嚴補膳部視西城河工管試驗廳監脩閱武門馬棚所至與中人交蹠算金錢估工役磨牙鑿齒岐口沓舌君洗手授事勾稽彈駁中人咸目誼之未有以中也久之用倉廩事鐫級臨清使竣坐馬棚事下獄閱十九月得白然竟用是罷君之督臨清廠也瀕行敵騎大至監視高起潛引兵躡之分城西東而陣高陣城東檄道臣高捷撤城內河西浮橋出郭外以渡師河西民擁衆不

聽撤捷逃匿不知所之君奮袖往大呼傳諭曰高監兵欲西者捍禦東面敵保城池也今擁河橋不聽渡敵飄突抵城下此時欲撤橋濟師晚矣民謹應曰敢不惟命我師渡而東敵騎解去人言國家之壞由于中人爲其蠹蝕國本資寇謀敵如蟲之兩口自嚙也然則河西之役寺人橫身却敵監司容頭僅免其忠邪勇怯相去又何如也嗚呼先皇帝以神聖之主遭逢多難中官朝士疑信參用卒之兩相甚間兩相謹諉國家事如無柁之舟無錘之稱浮沉下上莫知道從一二郎署小臣輿譟疾號橫流一葉曾何救乎敗亡如君者可勝歎哉乙酉元旦北向擗踊清明日拊膺哭曰乞兒馬醫瀝酒漬地十二陵誰奠一盂麥飯耶忽忽臥病無生人之樂辛卯二月年六十有八患風痺以歿嗚呼其尤可悲也君少從長姊夫王淑士遊學討論經史場屋之文最有原本天性孝友內外無間言居官廉辦不苟取予其與人不翕翕熱亦無崖岸嶄絕之行因淑士交李長蘅及余皆有終始娶周氏生子陞臣歲貢今富陽令繼譚氏生階臣埰臣

皆諸生女九人孫男女六人陞臣以某月某日葬君朱夫圩之高原兩恭人祔焉以父執故乞銘銘曰

丹樓如霞兮衛河湯湯清嘯不遐兮尺組猶長衣冠月出兮寢園薦荒歿而猶視兮回向北邙眇然書生兮與國存亡涕盈其銘兮孰知我傷

懷遠將軍進階安遠將軍錦衣衛指揮同知北鎮撫司掌司事王府君墓

誌銘

崇禎九年烏程枋國興牢修朱並之獄而余首及難大金吾希承風旨鍛鍊具獄獄三上上不許詔下東廠公謝廠事家居扼腕歎詫召廠故吏告曰起大獄殺大臣骹大法蒙蔽當宁衛代閣剗刃而廠代衛受名不已慎乎吾雖謝事舊刑官也庸敢不以正告諸人聞之股栗具以公言白廠璫璫大悟屬所司推鞫盡得鈎連文致狀上震怒尸三奸人于闕下烏程罷不再召命法司釋余方獄急人莫知也楚人汪雲卿客公所請以告余公屬曰闕之母使烏程知而甚我

烏程死又囑曰終閼之虞山將大用吾不欲知而德我也汪生爲余言公之長者如此越二十載歲在丁酉公卒于淮安之寓舍將葬次子侍御燮撰事狀請余銘狀稱公掌詔獄前後平反大小百四十餘件奏疏累二百章未嘗有寄請他比瘕死一人如汪生所云公閼不言者狀不具列也余乃爲按覈本末大書首簡而次及其行事曰公諱宗德初名崇德以崇禎紀元易焉其先楚黃陂人世系籍京師起家歷東廠理刑掌刑北鎮撫司掌司事累升指揮同知封懷遠將軍覃恩進階安遠將軍公幼孤事母篤孝嘗使至江南食楊梅鮮鱗投箸泣曰吾母未嘗此也坦衷好善急人之難甚于己溫文易直不斬立崖岸燕處向晦肅衣危冠坐凜如也爲刑官每謂尙德緩刑書以戒子姓嘗脫人于厄暮夜裹金來餽閉門却之亦竟不以告人也卒時年七十有九娶徐氏繼娶李氏子六人長雍中壬午鄉試副榜次卽侍御燮中崇禎丁丑進士歷今官次庭官金吾言癸未榜武進士賓廉皆弟子員女一人孫男女若干人嗚呼論獄于東廠

難言之矣委寄嚴密疑鬼疑帝伯州犁之上下其手孰知其狀華合比之坎牲埋書孰爲之徵武安侯之蜚語王長君之乘間改形易貌旁行側出閤衛之狡者叅居其間抽偃師之機而收漁人之利於是乎詔獄益不可問矣公與余無私交不避權要公正發憤其大意則欲爲國家持三尺法摭柱閣衛存國體扶士氣發明主上神聖無使煬竈食角之徒陽施陰設而歸其獄于明主豈獨爲禁近申職掌哉昔在孝廟時掌錦衣牟斌戚畹出李夢陽于獄夢陽秘錄備載其事今之志錦衣者徵焉余舊待罪太史氏史失求野吾猶及載筆其敢避而不書或曰狀不書誌書之可乎曰狀之不書公之志也書其綱不系其事使人習其讀而問其傳史家之法也狀旣引之矣誌安得而沒諸銘曰

國有禁獄廠西東黃門北寺寄命隆楮人竊枋天夢夢左執鬼宮右殤中閤衛參立假神叢宮鄰金虎神鬼工飲章錄牒葦筍同垣牆貫索占不空公奮隻手抉霧雰矢心掉舌質昊穹鼠狐滅跡豺虎窮天晶日明光昭融欽哉宸